

ახალი თვალსაზრისი მოგების კატეგორიის შესახებ

შოთა ვეშაპიძე,
ემდ, სტუ-ს პროფესორი

ეკონომიკური თეორიის ძირითადი კატეგორიების, მათ შორის მოგების შესახებ ცოდნა დროთა განმავლობაში ცვლილებას განიცდის. მეცნიერების განვითარების თანამედროვე დონე მეტ მოთხოვნებს აყენებს და მეტ შესაძლებლობასაც იძლევა ამ კატეგორიათა გაგებისათვის. ეკონომიკის თეორიაში რიგ კარდინალურ სიახლეთა, ძირეული იდეების შემოქმადიანი მეცნიერთა თეორეტიკოსი გიორგი მაღაშია (ვგულისხმობთ მის ნაშრომებს: „მეტაეკონომიკა-ეკონომიკის ფილოსოფია“, „ადამიანური ეკონომიკა“ და სხვა, რომლებიც გავრცელებულია საერთაშორისო მასშტაბით) თვლის, რომ მოგების დრმა არის, სოციალური ბუნების, წყაროების შესახებ სრული და ჭეშმარიტი ცოდნა (თეორია) ჯერჯერობით არ არსებობს, ამიტომ აუცილებელია ამ მოვლენის უფრო დრმა შრეებში ფართო ხედვით წვდომა. ამგვარი გზით მიღებულ ცოდნას მოგების შესახებ იგი მოგების მეტათეორიას უწოდებს, რაც, ჩვენი აზრით, მეცნიერულ საფუძლიანობას არაა მოკლებული.

ავტორი მოგების არსებული თეორიების მოკლე ანალიზს აკეთებს და მიიჩნევს, რომ აუცილებელია მოგების როგორც ერთ-ერთი უმნიშვნელოვანესი ეკონომიკური კატეგორიის შესახებ არსებული თეორიების გადასინჯვა, მოგების ახალი თეორიის ჩამოყალიბება ფართო და დრმა ხედვის საფუძველზე. ასეთი ხედვა კი გულისხმობს მოგების წარმოქმნის წყაროების, მითვისების წესის, საბოლოოდ გამოყენების არსებული მექანიზმისა და პრაქტიკის შეფასებას ახალ მეთოდოლოგიაზე დაყრდნობით, შემდეგ ამ საფუძველზე ჭეშმარიტების ძიებას მოგების ნამდვილი არსის, წარმოქმნის პროცესის, მითვისების სამართლიანი წესის და ეფექტიანი გამოყენების შესახებ მთელი საზოგადოების, მისი წევრების და არა მხოლოდ ცალკეული სუბიექტების სასარგებლოდ. მოგების ამგვარი თეორია ასევე მნიშვნელოვნად ცვლის ეკონომიკური ცოდნის რიგ ძირითად პოსტულატებსა და ფუძემდებლურ დებულებებს.

მიგვაჩნია, რომ ავტორი სწორი და გაუკვალავი გზით მიდის მოგების დრმა აზრის გარკვევის, მისი სოციალურ ბუნების, წარმოქმნის პროცესის, განაწილებისა და მითვისების, ასევე გამოყენების რეალობაში არსებული პირობების შეფასებისას. მოგების წარმოქმნის წყაროს გასარკვევად მას შემოაქვს ახალი ცნებები „სოციალური ენერგია“, „მუქთი (ფასგადაუხდელი) რესურსები“ „გენეტიკური მიდგომა“ და სხვა, რომელთა მეშვეობით, ლოგიკური მსჯელობებითა და ფაქ-

ტობრივი არგუმენტებით ასაბუთებს, რომ მოგება არ წარმოადგენს წარმოების რომელიმე ფაქტორის ან ცალკეულ სუბიექტთა მიერ შექმნილ შემოსავალს. ის არის განვითარების შედეგი, ე.ი. ბუნებისაგან, ასევე ისტორიისაგან (წინა თაობათაგან მემკვიდრეობით) მიღებული სოციალური ენერგიის მუქთი, ე.ი. ფასგადაუხდელი რესურსების გამოყენებით საქმიანობის პროცესში შექმნილი წმინდა - დანახარჯებზე მეტი - პროდუქტის გარდაქმნილი ფორმა, ანუ გარკვეულ (საბაზრო) გარემოში მითვისებული შემოსავალი.

ავტორი ასევე აყენებს მნიშვნელოვან საკითხს - მოგების მითვისების სამართლიანობისა და გამოყენების ეფექტიანობის შესახებ, რის კრტიკულად მას მიაჩნია მოგების მეშვეობით მთელი საზოგადოებისათვის (და არა მხოლოდ ცალკეული ინდივიდუუმებისათვის) მოტანილი რეალური (და არა ილუზიური) სიკეთე. იგი ისტორიულად მოგების განაწილებაში ხედავს უსამართლობის ხარისხის შემცირებას, როცა მისი მნიშვნელოვანი ნაწილი კერძო სუბიექტებიდან საზოგადოებას უბრუნდება სახელმწიფო ბიუჯეტის შევსების, ქველმოქმედებისათვის გაღებული სახსრების გზით და სხვ. ასევე რეინვესტირებით - ახალი სამუშაო ადგილების შექმნით, რაც ზრდის ადამიანთა შემოსავლებს, საზოგადოების დოვლათს. ამის გარეშე კი მისი არსებობა შეუძლებელი იქნებოდა და მას აზრი არც ექნებოდა.

ამასთან მოგების მითვისების ადრინდელ და თანამედროვე წესში ავტორი მაინც ხედავს უსამართლობის და ცდილობს დაასაბუთოს, რომ ეს კვლავ რჩება ეკონომიკისა და საზოგადოების ჰუმანიზაციის შემაფერხებელ მიზეზად. გიორგი მაღაშია აყალიბებს მოგების მითვისების ახალ მოდელს, რომელიც მოგებას აქცევს მთელი საზოგადოების, მისი წევრების კეთილდღეობის წყაროდ, ისე, რომ შეესაბამებოდეს სამართლიანობის პრინციპს. ისტორიული პროგრესი, მისი აზრით, სწორედ ამ გზით მიდის.

ავტორის მსჯელობები, ჩვენი აზრით, მოგების ახალი, მეტათეორიის ძირითადი დებულებების ჩამოყალიბებისთვის მყარი და დამაჯერებელია. მთლიანად გიორგი მაღაშიას ნაშრომი მიგვაჩნია სრულიად ორიგინალურ თეორიულ გამოკვლევად, მეტად მნიშვნელოვან მეცნიერულ სიახლედ. უეჭველია საერთაშორისო და ქართულ მეცნიერებაში იგი გამოიწვევს დისკუსიას, მაგრამ ეს სასარგებლო იქნება მეცნიერების განვითარებისთვის.